

**Evangelisch Kirchgmoinde Poppaweilr**  
**Gottesdiensch am 25.06.2023**  
**uff schwäbisch (Pfarrer Häcker)**

---

Liabe Leit!

Kennat ihr di Gschicht vom Jona? Die isch no ältr als Poppaweilr – scho ibr zwoiahalb Dausat Jahr alt. Mir gfeilt di saumäßig guat. Se gheert zu dene Gschichta, die i obedengt en dr Schual vrzehla muaß. Wia neilich erscht en dr zwoita Klass.

Dr Jona ghert vielleicht zu de bekanndaschte Leit en dr Bibl. Scho alloi des mit am große Fisch, der an vrschluckt hot, wird emmr no en viele Kendrgärta vrzehlt. Abbr woiß mr vor lautr Fisch au no, om was es sonscht ganga isch?

Dr Jona hot vom Herrgott an Ufftrag griagt: „Gang nach Ninive on sag de Leit: En 40 Dag isch eir vrdorbane Schtadt he!“ Abbr dr Jona isch net ganga. Er hot d Hos voll ghet vor lautr Schiss. On er hot denkt: „Soll sich dr Herrgott doch an andra Domma suacha!“ Deshalb isch r grad zom Bossa genau en d andr Richtung abghaut: Schdatt nach Oschda en d Höhle vom Löwa, isch r nach Weschda ganga. Ans Meer. On dort mit am Schiffle naus uffs Wassr. Doo soll an dr Herrgott erschtmool fenda!

Abbr dr Jona hot sein Ufftrag-Gebr ondrschätzt. Dr Schturm uff am Meer war koi Zufall. Der isch quasi „direkt von oba“ uff an rontrgfalla. On hot net bloß an Jona, sondern au alle andere, oschuldige Leit uff am Schiff fascht s Leba koschdat. Erscht wia dr Jona sei Schuld eigseha hot, hot dr Schdurm uffgheert. So warat wenigschdens dia andre grettat.

Als Schdroof fir sei Vrsaga hen dia Matrosa den komischa Kauz ens Meer gschmissa. Doch au doo hot r sich no deischt. Wenn r ghofft hot, aus seim Ufftrag „durch da Dod“ entkomma z kenna, war des an Satz mit X. Scho widdr hot dr Herrgott eigriffa – desmool quasi „direkt von onda“. Hot an große Fisch gschickt, der dr Jona gschluggt on nach drei Däg ans Land gschbuggt hot. Ällas widdr uff Null also.

On däglich griaßt des Murmldierle: „Jona! Gang nach Ninive on sag de Leit: En 40 Dag isch eir vrdorbane Schtadt he!“ Dr Jona hot s drweil gschnallt: Dem Gott doo oba kommt r net aus! So hot r sich endlich uff dr Weg gmacht. On hot en Ninive sein Ufftrag erfüllt. Drbei hot r sich schon saumäßig gfreit uff die Kadaschdrof, dia n r ookendigt hot. So an halba Weltondrgang sieht mr jo net äll Dag!

On scho widdr wars an Satz mit X: Dia Leit von Ninive hen – ganz anders als dr Kerle selbr – uff da Herrgott gheert. Se hen kabiert, was bei eahne bleed gloffa on ibrhaupt net guat isch. On se hen, was i mir manchmal au fir heit wenscha däd, omdreht. Hen oogfanga, ihr Vrhalta zom vrändra. On hen au drnooch gfroogt, was denn dr Herrgott will, wia ihr Leba bessr werda koo.

I les jetztat, wia dia Gschicht an ihr End kommt:

**3-10 Dr Herrgott hot gseah, was dia Leit von Ninive doa hen: Se hen uffgheet mit ihm beesa Vrhalta on sen omgheert. Doo hot s am leid doa, dass r se hot ombrenga wella. On er hot beschlossa, dass r sei Drohung net woahr macht.**

**4-1 Doo hot sich dr Jona saumäßig dribr uffgreet. Er isch narrat worra.**

**2 Er hot betat on zom Herrgott sagt: „Des han e mr scho denkt, wia n e no drhoim gwä ben. Deswäga ben e joo au nach Tarschisch abghau! I han s joo scho emmr gwisst: Du bisch vollr Gnad on Barmherzichkeit! En deim Guatsei heersch net uff mit deinr Geduld. Du bisch an Gott, dem s Oheil leid duat.**

**3 Abbr jetzt roicht mrs! Lass me schderba! I mecht liabr dod sei als so weidreba!“**

**4 Doo hot n dr Herrgott gfroogt: “Moinsch wirklich, du hosch recht mit deira Wuat?“**

**5 Noo isch dr Jona aus dr Schtadt naus. Em Oschda hot r sich a Plätzle gsuaht on an Hittle baut. Er hot sich en ihrn Schatta ghockt. Von doo aus hot r zuagugga wella, was mit dr Schtadt bassiert.**

**6 Doo hot dr Herrgott an mords Drom Rhizinus wachsa lassa. Der isch em Jona grad ibr dr Kopf gwachsa on hot am an Schatta geba. On scho hot dr Jona sei Wuat vrgessa on sich riesich ibr den Rhizinus gfreit.**

**7 Abbr scho am nägschda Morga hot dr Herrgott an Wurm gschickt, der em Rhizinus d Wurzla durchgnagt hot. Doo isch der widdr eiganga.**

**8 On wia d Sonn uffganga isch, hot dr Herrgott au no an heiße Oschwend gschickt. Noo hot em Jona d Sonn uffs Hirn brennt, dass r fascht omächtig worda isch. Doo hot r scho widdr nemme leba wella on hot gsagt: “I mecht liabr dod sei als so weidreba!“**

**9 Dr Herrgott hot dr Jona gfroogt: “Moinsch wirklich, du hosch recht mit deira Wuat? Bloß weil dr Rhizinus widdr eiganga isch?”  
Dr Jona hot gsagt: „Ja, i han scho recht mit meira Wuat on dass e nemme leba will!“**

**10 Doo hot dr Herrgott gsagt: “Dir duat des mords Drom Rhizinus leid. Drbei hosch du ibrhaupt koi Gschäft mit am ghet on hosch an au net großzoga. Der isch oifach nachts gwachsa on ebaso oifach nachts widdr eiganga.**

**11 On jetzt froog i di: Sodd i koi Mitleid han mit Ninive? Des isch a mords Drom Shtadt mit meh als 120.000 Leit! Dia wissat alle net was lenks isch oddr rechts. On dann no dia viele Diarla! Sott mir des ällas net leid doa?”**

Doo heert dia Gschicht uff, liabe Leit! „Doo heert sich joo ällas uff!“, kennt mr denka. A Gschicht ohne häbbi end? Wie gooht se weidr? Wie hot dr Jona reagiert? Des gooht doch net, midda dren uffzumhera!

Genau des, liabe Leit, fend i irgadwia klasse. Weils dia Gschicht schafft, mi mit nei zom nemma: Wie hett *i* wohl reagiert, wenn *i* dr Jona gwä wär? Oddr no a weng weidr: Was han *i* mit dem Jona gleich? Eigatlich will i mit *dem* net viel gleich han. Der isch nemlich ällas andre als an Held. Der isch fascht an Anti-Held. Mit so oim will i mi net gleichsetza lassa!

Abbr au jetzat muaß i saga: Satz mit X! Weil i zuagebba muaß, dass au i ällas andre ben als an Held. Dass i oft gnuag genauso feig drvo lauf wie dr Jona. Dass i net selta d Hos voll han vor lautr Schiss. On dass mir manchmool au a Schdroof gheert.

Ganz gnau desdrweg ben i so froh, liabe Leit, dass as dia Jona-Gschicht gibt. Weil se mr ois zoigt: Dr Herrgott koo au mit Leit wie em Jona on wie mir ebbas oofanga! Dr Herrgott koo nemlich, wie mr so schee sagt, uff kromme Linia grad schreibe. Koo emmr no was draus macha, wenn i nemme weitr komm.

On deshalb fend i *oin* Satz aus der Jona-Gschicht ganz wichtig, den i mir heit merga will: *I han s joo scho emmr gwisst: Du, Gott, bisch vollr Gnad on Barmherzichkeit! En deim Guatsei heersch net uff mit deinr Geduld. Du bisch an Gott, dem s Oheil leid duat.*

Doo koo i bloß no saga: Gott sei Dank!

Amen.